



## SASTANAK ŠEFOVA POLICIJA I TUŽILAŠTAVA U BiH

### Saradnja je ključna u borbi protiv kriminala

U sjedištu MUP-a Republike Srpske u Banjoj Luci održan je sastanak šefova policijskih agencija i tužilaštava u Bosni i Hercegovini.

Na sastanku je bilo riječi o aktuelnim predmetima u tužilaštvima, kao i o realizaciji zaključaka u vezi sa analizom razloga za donošenje velikog broja naredbi o neprovođenju i obustavi istrage u tužilaštvima u BiH. Razgovarano i o koordinaciji tužilaca i policije u provođenju posebnih istražnih radnji, kao sofisticiranog oblika prikupljanja dokaza, kao i o složenim istragama u kojima učestvuje više policijskih agencija, saopšteno je iz Tužilaštva BiH.

Na sastanku su učestvovali glavni tužitelj Tužiteljstva BiH Goran Salihović i šef Posebnog odjela za organizirani kriminal, gospodarski kriminal i korupciju Božo Mihajlović, glavni tužitelji Federacije BiH, RS-a i distrikta Brčko, Zdravko Knežević, Mahmut Svraka i Zekerija Mujkanović, Specijalnog tužiteljstva RS-a Midrag Bajić, direktori SIPA i entitetskih policija i policije distrikta Brčko, Perica Stanić, Gojko Vasić, Dragan Lu-



kač i Goran Pisić, kao i predstavnici Visokog sudskog i tužilačkog vijeća BiH.

Glavni tužilac Tužilaštva BiH Goran Salihović istakao je da su saradnja i koordinacija ključni za efikasnu borbu protiv svih oblika kriminala i uspostavljanje vladavine prava u Bosni i Hercegovini. Predstavnici VSTV-a su predstavili statističke rezultate koji ukazuju u kojem smjeru su potrebne dodatne koordinacije i komunikacija između tužilaštva i policijskih agencija.

Sastanak u Banjoj Luci je drugi najviših zvaničnika tužilaštva i policije iz cijele BiH, a održan je u okviru projekta VSTV-a Jačanje tužilačkih kapaciteta u sistemu krivičnog pravosuđa BiH.